

Dal privel d'armas memia bain disponiblas

Ura da dumondas dal cussegl grond

■ (anr/fa) Ina dunsaina da deputadas e deputads han fatg mardi dumondas a la regenza. Duas da quellas han tematisà ils cas dad amoc en Svizra ed ils blers suicids surtut da personas da 15 fin 25 onns. «La Svizra è in dals pajais en Europa cun ils pli blers cas da suicids», ha constatà *Christina Bucher-Brini* (ps, Cuira) mardi a chaschun da l'ura da dumondas. L'onn passà s'han 1100 personas privadas d'vita en Svizra. «Tar la gruppa da las personas da 15 fin 25 onns vegliadetgna è il suicid il gener da mort il segund frequent», ha ditg la deputada, «e quai era, sche experts èn da l'avis che blers da quests suicids pudessan vegnir evidads cun musar ch'i dat adina alternativas.» En blers chantuns crescha il dumber da suicids, p.ex. en il chantun Berna u en l'Argovia, nua ch'ins ha stuì constatar l'onn passà 14 pertschient daplirs suicids. Ella ha vulì savair co che la situaziun sa preschenta en Grischun. «L'onn passà s'han suicidadas 43 personas, quai èn dus cas daplì u stgars 5 pertschient daplì che l'onn avant», ha respus cusseglier guvernativ *Christian Rathgeb*, «la regenza ha incumbensà l'uffizi da sanadad da s'engaschar per la prevenziun da suicids cun elavurar in plaun d'acziun per la sanadad psichica. Sa basond sin l'evaluaziun da l'uffizi da sanadad vegn il chantun alura ad infurmar davart la situaziun ed eventualas ulteriuras mesiras.»



Il chantun prenda adina puspè enavos armas che nagin drova.

KEYSTONE

«Svizra pronta per ina lescha d'armas pli severa»

Beat Deplazes (suppl. ps, Cuira) ha menziunà che l'onn passà sajan mortas tar cas d'amoc en Svizra 10 personas e 9 personas vegnidadas feridas. «Apparentamain èn armas tar nus memia spert disponiblas», ha el ditg e dumandà, tge ch'il chantun fetschia cunter il privel da cas d'amoc. Cusseglier guvernativ *Christian Rathgeb* ha ditg che la polizia chantunala haja organisà d'atun 2009 ina acziun per ramassar armas veglias: «Quella giada han ins

pudì prender enavos 858 armas e 300 kilos muniziun, la populaziun ha vinavant la pussaivladad da manar a la polizia gratuitamain armas e muniziun.» En media vegnan surdadas a la polizia var 250 armas l'onn. «La prontadad per ina lescha d'armas pli severa en Svizra è avant maun, las polizias chantunales èn p.ex. londervi a stgaffir ina plattafurma d'armas naziunala», ha Rathgeb menziunà, «perquai nun exista en Grischun per entant il basegn ch'il chantun decidia ulteriuras mesiras.»